

周氏
駿
酉
學
子
敬
書



曾
光緒辛卯仲秋
池陽周氏校刊
美

增輯難經本義

難經本義增輯序

難經繼靈素而起爲醫經之正宗前人久無異議至徐靈胎氏乃摘其紕繆甚眾丁履中氏乃移其篇第託言古本金山錢錫之又因脈經引扁鵲語不見難經引難經語不稱扁鵲疑難經非越人書也其言皆新奇可喜而未察其實也夫難經非全書也非因內經之難明而有意詮釋之也古之習於內經者心有所會撮記旨要以期無忘焉耳故有直抒所見不必出於內經者有竟取經文爲問答絕不參以己說者察其所言皆內經之精髓不易之定法其於大義已無不賅而不必如內經之詳且備也讀內經者必及難經非讀難經即可廢內

經後世厭內經之繁而難通但取難經而索之無怪其
窒而滋之惑也卽如一難爲全書開宗作者豈肯率爾
爲之乃後人攻擊逐句皆疵夫寸口獨取豈曰三部不
參榮衛相隨詎云晝夜同道況難經之有功於軒岐而
大資於天下萬世也在於發明命門猶程子謂孟子之
有功於聖門在發明性善也而後人卽以此爲詬病將
亦謂性善之說不見於論語而斥之耶內經三部九候
但言身之上中下至越人始兼以寸關尺浮中沈言之
自是寸口診法始精而備萬世不能易矣前有岐伯後
有越人皆醫中之開闢草昧者也自宋以來註難經者
二十餘家滑氏以前多不可見僅見明王九思所輯今

讀其詞多繁拙而少所發明至滑氏始能曉暢徐氏雖好索瘢猶可引人以讀內經也張天成氏丁履中氏庸極矣丁氏尤多臆說今主滑氏本義其諸家之議可互發者附之偶參鄙見則加按以別之夫豈敢謂能羽翼經旨也以視夫庸詞臆說橫肆詆謔者當有閒矣請以質之海內之明於斯道者

光緒十七年歲次辛卯長夏建德周學海澂之記

徐氏曰諸家刊本簡首俱有圖像此起於宋之丁德用亦不過依文造式無所發明惟三十二難論昏嫁四十難論長生兩說須按圖爲易見然注自明備亦可推測而曉滑氏原書卷首備列諸圖今依徐氏刪

之激之又記

難經本義序

素問靈樞醫之大經大法在焉後世諸方書皆本於此
然其言簡古淵涵未易通曉故秦越人發爲八十一難
所以推明其義也然越人去古未遠其言亦深一文一
字意周旨密故爲之註釋者亦數十家但各以臆見而
卒無歸一之論或得此而失彼或舉前而遺後非惟自
誤又以誤人識者病焉許昌滑君伯仁篤實詳敏博極
羣書工於醫者三十四年起廢愈痼不可勝紀遂晝惟
夕思劬推遠索作難經本義二卷析其精微探其隱曠
鈎其玄要疑者辨之誤者正之諸家之善者取之於是
難經之書辭達理明條分縷解而素問靈樞之奧亦由

是而得矣夫人之生死係於醫醫之本原出於經經之
旨不明其害可勝言哉然則伯仁之功豈小補者耶
至正二十六年二月工部郎中揭泂序

難經本經序

醫之爲道聖矣自神農氏凡艸木金石可濟夫天死札
瘥悉列諸經而入十一難自秦越人推本軒岐鬼臾區
之書發難析疑論辯精詣鬼神無遁情爲萬世法其道
與天地並立功豈小補也哉且夫人以七尺之軀五臟
百骸受病六氣之沴乃繫於三指點按之下一呼一吸
之間無有形影特切其洪細濡伏若一髮苟或謬誤則
脈生而藥死之矣而可輕以譚醫而可易以習醫邪寓
鄞滑伯仁故家許許去東垣近蚤爲李氏之學遂名于
醫子雅聞之未識也今年秋來遺所撰難經本義閱之
使人起敬有是哉君之精意於醫也條釋圖陳脈絡尺

寸部候虛實簡而通決而明予雖未嘗學而思亦過半矣嗚呼醫之道生道也道行則生意充宇宙澤流無窮人以壽死是則往聖之心也世之學者能各置一通於側而深求力討之不爲良醫也者幾希烏乎越人我師也伯仁不爲我而刊諸梓與天下之人共之是則伯仁之心也故舉其大指爲序

至正七十五年龍躔甲辰十月旣望翰林學士承旨榮祿大夫知制誥兼修國史張翥序

凡例

一難經正文周仲立李子埜輩擅加筆削今並不從
一紀齊卿於經中盛字多改作甚字豈國諱或家諱
有所避耶蓋昧於臨文不諱之義也今不從

一經中錯簡衍文辯見各篇之下仍爲缺誤總類以
見其槩

一八十一難經隋唐書經籍藝文志俱云二卷後人
或釐而爲三或分而爲五今仍爲二卷以復書志
之舊揚玄操復爲十三類以統之今亦不從說見
後彙攷中

一本義中引諸書者具諸書之名引諸家者具諸家

之名其無所引具及愚按愚謂者則區區之臆見也其設爲或問亦同

一本義引諸家之說有以文義相須爲先後者有以論說高下爲先後者無是二者則以說者之世次爲先後云

一難經八十一篇蓋越人取內經靈樞之言設爲問答前此注家皆不放所出今並一一攷之其無可攷者於七難內發其例

闕誤總類

七難三陰三陽次第脈經與此不同脈經於三陽則少陽太陽陽明三陰則少陰太陰厥陰

十二難馮氏謂此篇合入用針補寫之類當在六十難之後以類相從也

十四難反此者至於收病也當作至脈之病也於收二字誤

十六難問三部九候以下共六件而篇中並不答所問似有缺誤

十七難所問者三所答者一疑有缺漏

十八難第三節謝氏謂當是十六難中答辭第四節或

謂當是十七難中或連年月不已答辭

二十難重陽者狂重陰者癩脫陽者見鬼脫陰者目盲當是五十九難結句之文錯簡在此

二十一難謝氏曰按本經所答辭意不屬似有脫誤

二十三難經云明知終始云云一節謝氏謂合在下篇之前不必然也祇參看

二十八難溢畜不能環流灌溉諸經者也十二字當在十二經亦不能拘之之下其受邪氣畜則腫熱砭射之也十二字謝氏直以爲衍文或云當在三十七難關格不得盡其命而死矣之下因邪在六府而言也二十九難陽維爲病苦寒熱陰維爲病苦心痛諸本皆

在腰溶溶若坐水中下謝氏移寘溶溶不能自收持
下文理順從必有所攷而然今從之

三十一難其府在氣街一句疑錯簡或衍文三焦自屬
諸府與手心主配各有所治不應又有府也

四十八難診之虛實下濡者爲虛牢者爲實八字脈經
無之謝氏以爲衍文楊氏謂按之皮肉柔濡爲虛牢
強者爲實然則有亦無害

四十九難第五節虛爲不欲食實爲欲食二句於上下
文無所關疑錯簡或衍文

六十難其真心痛者眞字下當有一頭字蓋總結上兩
節也

六十九難當先補之然後寫之八字疑衍

七十四難篇中文義似有缺誤今且依此解之俟後之

知者

七十五難金不得平木不字疑衍詳見本篇

八十一難是病二字非誤即衍